



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las sequaintas fatschendas:

Plan da quartier Chaschiners

Las prescripziuns dal plan da quartier vegnan cumplettadas cull'opziun d'ün passagi public tanter Brentsch e la Via da la Staziun. Davo chi nu sun entrats ingüns recuors d'ürant la publicaziun decida il cussagl da trametter il plan da quartier sco stat abinà a l'uffizi da planisaziun in connex cul plan da fuormaziun.

Rondella pro l'imboccadüra Via dals Bogns/Stradun

Üna rondella süsom la Via dals Bogns dess ameglrdar la situaziun dal trafic pro l'imboccadüra aint il Stradun. I sun avant man duos propostas. Il cussagl decida da princip da vulair realisar la rondella. La decisiun definitiva regard il termin pella realisaziun tira il cussagl pür cur chi'd es avant man üna calculaziun da cuosts e'l stüdi pella zona da tempo 20 km/h pel center dal Stradun (siond cha la rondella pudess fuormar il cumanzamaint da quella zona).

Canorta

Il cussagl arcugnuoscha il bsögn per üna canorta ed es eir pront da sustgnair quist proget finanzialmaing. Tenor ils preventivs e la clav da scumpart sto Scuol far quint cun cuosts da raduond CHF 16'000.-- l'on. Dumondas a reg. administraziun e localitats ston amo gnir scleridas. Pel cussagl esa fich important cha la canorta sustegna eir l'integraziun linguistica dals uffants chi nun discuorran rumantsch a chasa.

Terrain per indigens

In discussiun sun differents lös, intant amo dadour la zona da fabrica. Per part han fingià gnü lö discussiuns cun proprietaris, cul böt da tils persvader da vender lur parcelas per la fabrica da chasas per indigens.

Quistas discussiuns vegnan cuntinuadas in basa a cifras plü concretas regard cuosts per render accessibel il terrain e predschs da vendita. Davo segua lura la preexaminaziun pro l'uffizi chantunal e la votumaziun reg. üna revisiun parziala.

Plan da quartier Schinnas vest

Il recuors cunter quist plan da quartier (avant e suot la storta da Liuns) d'eira gnü trat inavant al tribunal federal. Uossa s'han ils contrahents però accordats in basa d'üna cunvegna bunaria. Il cussagl ha tut cogniziun da quista cunvegna ed es perinplet culs adattamaints da la planisaziun. Sper la publicaziun ordinaria vegnan avisadas las persunas pertoccas eir directamaing.

Dumondas da fabrica

Il cussagl resp. la direcziun han dat ils seguaints permiss da fabrica:

- a la Posta Svizra per üna garascha pels autos da posta, ün center "Postmail" ed ün stabilimaint per büros da la posta a Buorna
- als conjugals Antonia + Simon Camastral-Cajochen per ingrandir l'abitaziun suot il tet da la Chasa Silvretta
- als conjugals Simone + Jon Erni per müdar intuorn ed ingrandir la chasa nr. 707 in Crastuoglia
- als conjugals Christina + Jon Andri Willi per üna chasa d'abitar sün parc. 1056 in Prà da Bügl
- a Domenic Gisep per transfuormar il salon da cuafför illa chasa nr. 211 in Clozza in ün'abitaziun
- als conjugals Ae + Matthias Merz per üna pergola cuernada süllas garaschas da lur chasa in Porta
- a l'Associaziun d'abitar Runà per sondas geotermicas (culla resalva cha l'Uffizi chantunal per natüra ed ambiaint detta l'acconsentimaint)

In connex cun implants fotovoltaics ha il cussagl cumünal trat la seguainta decisiun: petents chi'd installeschan l'implant per vender forza electrica (i'l rom dal program federal "Kostendeckende Einspeisevergütung KEV") han da pajar la taxa pel permiss da fabrica cumünal. Il cumün relascha la taxa be scha l'implant serva unicamaing per l'agen adöver.